



ՀԵԼՍԻՆԿՅԱՆ ՔԱՂԱՔԱՑԻԱԿԱՆ ԱՍԱՄԲԼԵԱՅԻ
ՎԱՆԱՁՈՐԻ ԳՐԱՍԵՆՅԱԿ
HELSINKI CITIZENS' ASSEMBLY
VANADZOR OFFICE

2001 Հայաստանի Հանրապետություն,
Վանաձոր Տիգրան Մեծի պողոտա 59
59 Tigran Metsi st.
Vanadzor, 2001, Republic of Armenia
Tel. (հեռ.) (374 322) 4 22 68
Fax (ֆաքս) (374 322) 4 12 36
E-mail: hcav@hcav.am
Ե/2014- 27.09/390
27.09.2014 թ.

ՀՀ գլխավոր դատախազ
Գ. Կոստանյանին

Դիմում-բողոք

(ՀՀ հատուկ քննչական ծառայության ՀԿԳ քննիչ Ա.Մինասյանի՝ քրեական գործի հարուցումը մերժելու մասին 16.09.2014 թ. որոշումը վերացնելու և քրեական գործ հարուցելուն պարտավորեցնելու պահանջների մասին)

1. Գործի դատավարական նախապատմությունը

2014 օգոստոսի 02-ին իր իրավունքների պաշտպանության համար ՀԲԱ Վանաձորի գրասենյակ է դիմել ՀՀ Լոռու մարզի Վանաձոր քաղաքի Գրիգոր Լուսավորիչ 40/38 հասցեի բնակչուհի Փնջիկ Հովհաննեսի Թերոյանը: Կազմակերպությանն ուղղված դիմումում քաղաքացին հայտնել է, որ 2012 ապրիլի 4-ին հանցագործության մասին հաղորդում է ներկայացրել ՀՀ ոստիկանություն: Հաղորդման հիման վրա ՀՀ ոստիկանության Լոռու մարզի քննչական բաժնի Վանաձոր քաղաքի Տարոնի քննչական բաժանմունքում քրեական օրենսգրքի 178-րդ հոդվածի հատկանիշներով հարուցվել է քրեական գործ: Քաղաքացին կազմակերպությանն ուղղված դիմումում հայտնել է, որ նախաքննության ընթացքում քննությունն իրականացնող քննիչների կողմից կատարվել են մի շարք խախտումներ: Մասնավորապես, քաղաքացին հայտնել է, որ ՀՀ ոստիկանության ՔԳՎ Լոռու մարզի քննչական բաժնի քննիչ Մ. Հարությունյանի և նույն բաժանմունքի ավագ քննիչ Մասուն Մխիթարյանի՝ քաղաքացու հաղորդման հիման վրա հարուցված քրեական գործի նախաքննության ընթացքում կատարված մի շարք զննություններ կատարվել են առանց ընթերականների ներգրավման:

2014 թվականի օգոստոսի 27-ին կազմակերպությունը դեպքի վերաբերյալ հանցագործության մասին հաղորդում է ներկայացրել ՀՀ հատուկ քննչական ծառայության պետ Վ.Շահինյանին, պահանջելով ձեռնարկել անհրաժեշտ միջոցներ սույն հաղորդմամբ

ներկայացված հանցագործությունը (հանցագործությունները) բացահայտելու և հանցանք կատարած անձանց պատասխանատվության ենթարկելու ուղղությամբ:

2014 թվականի սեպտեմբերի 16-ին ՀՀ ՀԿԳ քննիչ Ա.Մինասյանը, քննարկելով ներկայացված հաղորդումը, կայացրել է քրեական գործի հարուցումը մերժելու մասին որոշում, որը կազմակերպությունում ստացվել է 2014 թվականի սեպտեմբերի 20-ին:

2. Վարույթն իրականացնող մարմնի ոչ պատշաճ քննության վերաբերյալ պնդումներ

Քննարկելով կազմակերպության ներկայացրած հաղորդումը և կայացնելով քրեական գործի հարուցումը մերժելու մասին որոշում ՀԿԳ քննիչ Ա. Մինասյանը ցուցաբերել է անգործություն՝ մի շարք կարևոր հանգամանքների շուրջ քննություն չիրականացնելով և դրանք փաստող կամ հերքող ապացույցներ ձեռք չբերելով, իսկ ձեռք բերված ապացույցների մեծ մասին տրվել է միակողմանի գնահատական՝ քողարկելով ՀՀ ոստիկանության աշխատակիցների կողմից թույլ տրված խախտումները և անօրինական գործողությունները: Մինչդեռ, ՀՀ քրեական դատավարության օրենսգրքի 17-րդ հոդվածի ուժով քրեական հետապնդում իրականացնող մարմինը գործի հանգամանքների բազմակողմանի, լրիվ և օբյեկտիվ հետազոտման համար կրում է օրենսգրքով նախատեսված բոլոր միջոցառումները ձեռնարկելու պարտավորություն: ՀՀ քրեական դատավարության օրենսգրքի 27-րդ հոդվածի 1-ին մասի համաձայն՝ «Հետաքննության մարմինը, քննիչը, դատախազը պարտավոր են իրենց իրավասության սահմաններում քրեական գործ հարուցել հանցագործության հատկանիշներ հայտնաբերելու յուրաքանչյուր դեպքում, օրենքով նախատեսված բոլոր միջոցառումները ձեռնարկել հանցագործություն կատարած անձանց և հանցագործության, ինչպես նաև դրա կատարման հանգամանքները բացահայտելու համար»:

Վարույթն իրականացնող մարմնի կողմից ոչ պատշաճ քննություն իրականացնելու փաստն ապացուցվում է ստորև ներկայացված պնդումներով:

2.1 Այսպես, կազմակերպության կողմից ներկայացված հանցագործության հաղորդման մեջ նշվում է, որ 2012 թվականի ապրիլի 27-ին Տարոնի քննչական բաժանմունքի ավագ քննիչ Ս. Մխիթարյանը գննել է Փնջիկ Թերոյանին պատկանող և նրա կողմից ներկայացված բջջային հեռախոսահամարի վերծանումները: Ըստ քննիչի կողմից կազմված արձանագրության՝ տվյալ քննչական գործողությանը որպես ընթերականեր ներկա են եղել Սուսաննա Գևորգի Հարությունյանը և Վալենտինա Արշալույսի Քալաշյանը:

2012 թվականի մայիսի 15-ին նույն քննիչի կողմից կատարվել է լազերային սկավառառակների գննություն, որտեղ որպես ընթերականեր են ներգրավվել Սուսաննա Գևորգի Հարությունյանը և Արամ Ռաֆայելի Այվազյանը:

16.09.2014թ. քրեական գործը հարուցելը մերժելու մասին որոշման մեջ վարույթն իրականացնող մարմինը նշում է՝ «ՀՀ հատուկ քննչական ծառայությունում նյութերի

նախապատրաստման ընթացքում Սուսաննա Հարությունյանը, Վալենտինա Քալաշյանը և Արամ Ռաֆայելի Այվազյանը բացատրություններ են տվել, որ բոլոր նշված դեպքերում ներկա են եղել հիշատակված գործողություններին և իրենց ստորագրություններով հավաստել են դրանց ընթացքն ու արդյունքները: Արամ Այվազյանը նաև նշել է, որ քաղաքացի Փնջիկ Թերոյանին չի ճանաչում և նրա հետ տվյալ հարցով զրույց չի ունեցել:

Ինչ վերաբերում է Սուսաննա Հարությունյանի և Վալենտինա Քալաշյանին, ապա պարզվել է, որ նրանք չեն հանդիսանում ոստիկանության ծառայողներ, *ոստիկանությունում աշխատում են, որպես հավաքարար*, գործով շահագրգռված չեն եղել, քննիչից որևէ կախման մեջ չեն գտնվել, հետևաբար՝ որևէ արգելք չի եղել նրանց՝ որպես ընթերակա ներգրավելու համար»:

Վարույթն իրականացնող մարմինը նյութերի նախապատրաստման ընթացքում ձեռք բերված ապացույցները գնահատել է միակողմանի և անհրաժեշտ քննչական գործողությունները չի իրականացրել հանցագործության հաղորդման մեջ նշված տեղեկությունների իսկությունը պարզելու համար:

Մասնավորապես, վարույթն իրականացնող մարմինն անտեսել է այն հանգամանքը, որ ընթերակաները հանդիսացել են ոստիկանության աշխատակիցներ, ինչպես նաև հաշվի չի առել վերջիններիս՝ նույն քննիչի կողմից քննչական գործողություններում՝ որպես ընթերակա ներգրավվելու պարբերականությունը, որը տվյալ դեպքում անթույլատրելի է:

Կազմակերպության կողմից ներկայացված հանցագործության հաղորդման մեջ նշվել է, որ ըստ քաղաքացի Փնջիկ Թերոյանի, 15.05.2012թ. լազերային սկավառակների արձանագրության մեջ որպես ընթերակա նշված Արամ Ռաֆայելի Այվազյանը իրենից է իմացել, որ գնման ժամանակ ընդգրկված է եղել որպես ընթերակա:

Գործի նյութերի նախապատրաստման ընթացքում չի կանչվել և բացատրություն չի վերցվել Փնջիկ Հովհաննեսի Թերոյանից, որպեսզի հնարավոր լիներ կազմակերպության կողմից ներկայացված հանցագործության հաղորդմամբ վկայակոչված դեպքերի վերաբերյալ առավել մանրամասն տեղեկություններ ստանալ: Վարույթն իրականացնող մարմինը տվյալ դեպքում ղեկավարվել է միայն մի կողմի բացատրություններով, չի իրականացրել բազմակողմանի, լրիվ և օբյեկտիվ քննություն:

2.2 Կազմակերպության կողմից ներկայացված հանցագործության հաղորդման մեջ նշվել է, որ ՀՀ ոստիկանության ՔԳՎ Լոռու մարզի քննչական բաժնի քննիչ Ս. Հարությունյանի կողմից 22.11.2012թ. լազերային սկավառակի ձայնագրառման գնության կատարման ժամանակ ներգրավված չեն եղել ընթերականեր և գնություն կատարելու արձանագրության մեջ նշված անձինք՝ Գառնիկ Վլադիմիրի Պետրոսյանը, երբևէ Վանաձոր քաղաքի բնակչության ռեգիստրում չի եղել և ՀՀ քաղաքացու անձնագիր չի ստացել, իսկ Բորիս Հերմանի Կոբայան քննիչի կողմից արձանագրությունում նշված հասցեում երբևէ չի հաշվառվել և հաշվառումից չի հանվել:

Վարույթն իրականացնող մարմնի կողմից քրեական գործի հարուցումը մերժելու մասին որոշման մեջ նշվել է՝

«Թիվ 62207512 քրեական գործի նախաքննության ընթացքում, 2012 թվականի նոյեմբերի 22-ին ՀՀ ոստիկանության ՔԳՎ Լոռու մարզի քննչական բաժնի Վանաձոր քաղաքի Տարոնի քննչական բաժանմունքի քննիչ Մհեր Հարությունյանը գննության է ենթարկել Փնջիկ Թերոյանի կողմից քննությանը ներկայացրած լազերային սկավառակը, որի վերաբերյալ կազմել է արձանագրություն: Համաձայն այդ արձանագրության՝ սկավառակի գննությանը որպես ընթերակա են ներգրավվել և *ներկա են գտնվել* Գառնիկ Վլադիմիրի Պետրոսյանը՝ ծնված 1961թ., բնակվող ք. Վանաձոր Շիրակացու 4/45 հասցեում և Բորիս Հերմանի Կոբալյանը՝ ծնված 1955թ., բնակվող ք. Վանաձոր, Կնունյանց 49 ա հասցեում: Պարզվել է, որ Վանաձոր քաղաքի Շիրակացու 45-րդ շենքն իրենից ներկայացնում է հանրակացարան, հիշյալ շենքում 65-րդ համարի սենյակ չկա, իսկ կատարված հարցումներով «Գառնիկ Վլադիմիրի Պետրոսյան» անուն-հայրանուն-ազգանվամբ անձնավորության՝ տվյալ հանրակացարանում բնակվելու վերաբերյալ տեղեկություններ ձեռք չեն բերվել: Վանաձոր քաղաքի Կնունյանց 49ա հասցեում գտնվող առանձնատունը պատկանում է նույն հասցեում հաշվառված Օնիկ Մկրտչի Լուսարարյանին, ծնվ. 22.05.1956թ., ով Բորիս Հերմանի Կոբալյան անուն-հայրանուն-ազգանվամբ անձնավորություն չի ճանաչում:

Քննիչ Մհեր Հարությունյանը ՀՀ Հատուկ քննչական ծառայությունում նյութերի նախապատրաստման ընթացքում բացատրություն է տվել, որ լազերային սկավառակի գննությունից առաջ, դրա ընթացքում որպես ընթերակա ներգրավելու համար ոստիկանության շենքի իր աշխատասենյակ է հրավիրել երկու անձանոթ անձանց: Քանի որ այդ անձինք իրենց մոտ տվյալ պահին անձնագրեր չեն ունեցել, արձանագրությունում տվյալները լրացնելիս հիմք է ընդունել նրանց բանավոր հաղորդած տեղեկությունները և չի բացառում, որ այդ անձինք իրենց մասին ճիշտ տվյալներ չեն հայտնել, քանի որ դժկամությամբ են համաձայնել մասնակցել որպես ընթերակա:

Նյութերի նախապատրաստման ընթացքում հանձնարարություն է տրվել ոստիկանության՝ օպերատիվ ճանապարհով պարզելու, թե իրականում քննիչի կողմից տվյալ գննությունը կատարելու ժամանակ ընթերակային ներգրավվել են, թե ոչ և ովքեր են եղել այդ անձինք:

Համաձայն ՀՀ ոստիկանության Լոռու մարզային վարչության Վանաձոր քաղաքի Տարոնի և Բազումի բաժինների պետերի գրությունների՝ ձեռնարկված միջոցառումներով չի հաջողվել պարզել որպես ընթերակա ներգրավված անձանց ինքնությունը»:

Ելնելով վերոգրյալից վարույթն իրականացնող մարմինը կայացրել է որոշում քրեական գործի հարուցումը մերժելու մասին՝ ՀՀ ոստիկանության ՔԳՎ Լոռու մարզի քննչական բաժնի Վանաձոր քաղաքի Տարոնի քննչական բաժանմունքի քննիչ Սասուն Մխիթարյանի և նույն բաժանմունքի քննիչ Մհեր Հարությունյանի արարքներում հանցակազմի բացակայության պատճառով:

Վարույթն իրականացնող մարմինը, սակայն, որևէ միջոց չի ձեռնարկել պարզելու, թե արդյոք քննչական գործողությունների իրականացման ընթացքում ընթերակային ներգրավված եղել են, թե ոչ: Տվյալ դեպքում ՀՀ ՀՔԾ ՀԿԳ քննիչ Ա. Մինասյանը առաջնորդվել է միայն ՀՀ ոստիկանության ՔԳՎ Լոռու մարզի քննչական բաժնի Վանաձոր քաղաքի Տարոնի քննչական

բաժանմունքի քննիչ Մասուն Մխիթարյանի բացատրություններով, որոնք չեն կարող օբյեկտիվ լինել:

Այսպիսով, վերոգրյալն ապացուցում է, որ քրեական գործի հարուցումը մերժելու մասին որոշումը կայացվել է գործի ոչ լրիվ, օբյեկտիվ և բազմակողմանի քննության արդյունքում, որը թույլ չի տվել արդարացի իրավական գնահատական տալ ոստիկանության աշխատակիցների գործողություններին:

Հաշվի առնելով վերոշարադրյալը, դեկավարվելով ՀՀ քրեական դատավարության օրենսգրքի 185-րդ հոդվածի դրույթներով՝

Խնդրում եմ

Վերացնել ՀՀ հատուկ քննչական ծառայության ՀԿԳ հասկապես կարևոր գործերի ավագ քննիչ Ա. Կ. Մինասյանի՝ քրեական գործի հարուցումը մերժելու մասին 16.09.2014 թվականի որոշումը և գործն ուղարկել նախաքննության:

Կից ներկայացվող փաստաթղթերի ցանկը՝

1. 27.08.2014թ. կազմակերպության կողմից ներկայացված հանցագործության մասին հաղորդման պատճեն,
2. 16.09.2014թ. ՀՀ ՀՔԾ ՀԿԳ ավագ քննիչ Ա. Կ. Մինասյանի՝ քրեական գործ հարուցելը մերժելու մասին որոշման պատճեն,
3. կազմակերպության կողմից քրեական գործ հարուցելը մերժելու մասին որոշման՝ 2014թ. սեպտեմբերի 20-ին ստանալը հավաստող ծրարի պատճեն:

Հարգանքով

կազմակերպության նախագահ՝



Արթուր Մաքունց

Կատարող՝ Ս. Սողոմոնյան
ssoghomonyan@hcav.am